



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :

f Tir Yimym

ig tiryimym@aolima

yt tir yimym

TAPAK 8

Moreh-i central forces talila yoktsü: Manipur Angh

SA20: Marcus Stoinis Durban Super Giants nung denogo

VOL. XXI NO. 96 (ADOK 96) DIMAPUR

ROGONÜ (FRIDAY)

ANJETI (JANUARY) 19, 2024

₹ 5.00

**Temesepba mozü shibelenem tatok magütsü: NSCN/GPRN**  
**Dimapur, Aenjeti/January 18 (TYO):** Ozüing alema temesepba mozü shibelenba ya talisa Naga national workers atema mapa kanasa tamajung lir. Anungji tang nungi tenzüka temesepba mozü shibelenba atema NSCN ajanga

khenyongi tatok magütsü. NSCN züingsem kar danga temesepba mozü shibelenba nung shilem agiba putetra, tulua süang tila süang, shinga nema tatok magütsü, ta NSCN/GPRN sangdong ka ajanga ashi.

**Lanurtemi pei sasa pei jenjang asadang-tettsü kanga dang nungtaker. Dr.Lanurenla**



Dr.Lanurenla

telangzüba agütsütettsüla, pei adenba lokti ajak nung tapet aser tetemsü telangzüba agütsütetbaji ajanga shisashir ka dang nüchiba shisaluyimer tetemsüta ajatsü akok aser nüchiba shisaluyimer takum ka jagi teti pei asoshi masü saka tangar atema bilemtsü aser tangar atema bilembaji ajanga alima tejakleni aniba nung shilem tulu agitettsüta Lanurenlaisa ashi.

**Küpza, January/Aenjeti 18(TYO):** 21 Buba putu nung shisatsü bushirtem asoshi shisatsü bushitsü lenmang sadem sadema lir, anungji item maongkatemji agiteta shisatsü bushia nüchiba shisaluyimer kümtettsü mangdang akatsülata 39 Buba Ongpangkong Kaketshir Mungdang(OKM) Inti mungdangdi Kúpza yimtak January 18 aonung Nüchiba Shisaluyim omen nung ajemdaker Sao Chang College, Tuensang, Principal Dr.Lanurenlai tongti o jembidang ashi.

Dr.Lanurenlaisa nüchiba shisaluyimer ka kümtettsü asoshi tangari sayuba kisüing nung angazüka ajangzüksü memerangi, yangji angazükba dang nungi ano pei sasa renloka bushiteta tetemsü takum ka renemtettsü tanu putui akangerta mungdangsanger kaketshirtem ayongzüka ashi.

Kaketshir kati kechisa angazük ibaji chichiba nung

Tanu 21 Buba putu nung lisemer ka ama lanurtemi pei sasa pei jenjang asadangtettsü kanga dang nungtaker, pei sasa pei jenjang jangja jangjaa nüchiba shisaluyimer terenemtet taküm ka asütsü asoshi pei ayakji pei sasa yangerloka yutettsü kanga dang nungtakerta Dr.Lanurenlaisa adenshia aliba kaketshir aser shisashirtem den shisa aguja lemsatetep.

Kasa sentong nung Ongpangkong Tetsür Telongjem Tir.Wt.Akumchilai tepela o jemi, Asetkong Kaketshir Telongjem Mungdang Tir. Sb.Kajenkaba Aier aser Jangpetkong Kaketshir Telongjem Mungdang Tir. Sb.Watinungsang tenatia salem o jembiba den Yimyu Baptist Arogo Pastor Wb.Puryapang-i Tsüngrem lenisüba jazüka sarasademer tenzük aser mungdang choir ajanga ken tajung ka adenba den Sb.Limasashi ketdangsüba nung iba sentong agi.

**Lanurtem tekolokbo lir sernung azümesener: Minister Metsübo Jamir**



(Abelen) Tongti tesemdanger Metsübo Jamiri 'Limketer' kaket sayatsüdang aser (Achiji) Mungdang Choirtemi ken atandang tangokba noksa nung angur. Mokochung, 18th January, 2024.

**Küpza, 18th Jan (TYO):** Jan 17 aonung nungi tenzüka 39 buba Ongpangkong Kaketshir Mungdang (OKM) inti mungdang yangi Kúpza yimdak "Nüchiba Shisaluyim" omen dak rangloker mungdar. Iba senden nung OKM kübok unit 18 nungi kaketshir aser tejaoker noklang pungu dak tali adenshia mungdaki.

Tanü iba sentong nung tongti tesemdanger Nagaland RD & SIRD Minister, Metsübo Jamir-i jembidang, tanü asenok iba jenjang tongtetba ya asenok ajungba agi masü saka asen tsüraburtemi khuret benteta inyaktetba yong lir, saka tanü lenmang aisü nung asenok atsüingzüka ogo, anungji, tanaben lungjemshir aser ajemalushir tejakleni mera aotsü asoshi pai ajungmeso.

Taoba mapang Ongpangkong nungger ajurutepdang yimer ajurur ama "asenok" ta sentepa ajurutep. Aji süaka, tanübo kidanger yimtemi "ner/nenok" ta dang jembiteper. Anungji, "ner/nenok" ta asüba ya toksür "asenok" ta jembia lungjema alitsü pai ayongzük.

Tanü Nagaland nung lanur zünger mapa mangur noklang shilem nung shilem 30 shi arishi küm 25-35 tetsüingta lir ta tebusitetba ka ajanga ngutet.

Arishi küm 25-35 ji tashika dang lir, saka tesasatsüka "tanü lanurtemi sorkar mapa dang bushir aser angati sen dang aginür" ta ashi. "Tokolokbo lir aser tetsüing tebena shitak dang lir sürnung tsürabur dak dang metaloka alir aser zünger kecha meinyaki kidang dang kazür", ta paisa tajitetba kar shisem.

'Naga nungger ya tachir/tagir (consumer) lokti ka dang kümatokogo. Tazünger onsara saka mapa inyaker mali, anungji, tazüngertema nükjidong tejangja yur azüingtsüla mesüra tenüing agi dangbo tezüingshi', ta paisa kaketshirtem ajungshi.

Mungdang akaba shia omen tajung tajung dang shima akar, saka mungdang temerbo itemji amatoker. Taoba mungdang ana asem tashi omen tajung shima agiba nung ajemdaker kechi mapasa inyakteta ali, ta paisa asüingdanga liasü. Taküm nungibo mungdang omen dak ajemdaker maparen karbo OKM-i achayangdaksünür aser shisatsü tajung dang bener arurbo yariteptsü mulunga lir, ta paisa shisem.

Tanü asen lima teka mapa balala inyakeritemji reprangdangra tanga lima nungi teimba anir arua inyakdaksür, tip külen asen liso nisungbo

zünger mapa teinyaktsü maka. Zünger kidang moka mekazüti pei kechi azüing iba yari mapa balala inyaktsü merangtsüla, ta paisa ajungshi. "Mapa inyakba nung aküm aser meraket lir", ta lanurtemi angatettsüla, ta paisa shisem.

Asen lima ali peria dang lir saka itemji arem dang küma odaktsür aser bendang lima nung dang liteptsü jangrar. Akhi yimya aser mulungsentsü melenshir lanurtemi entrepreneur tsütsü temulung agütsütsüla. Paisa lanurtem dang tachir/tagir lokti masü züsenter lokti kümdaktsütsü nükla yur meranga azüingtsü aser inyaktsü ayongzük.

Tongti tesemdangerisa OKM-i adokba "Limketer" kaket ka sayatsü. Iba sentong nung Ao Kaketshir Mungdang tir - Lanutoshi Aier, Central Nagaland Students' Association tir - R. Sunep Pongen, Ongpangkong Kaketshir Mungdang tir - Limatongzük Jamir parnokia shilem balala agi. Sentong nung OKM züingsem tangar dang alakteta takok angurtem nem tetushi agüja nungyu kaka agi senpettsü. Mungdang choir aser Chungtia Kaketshirtemi ken atenba ajanga mungdangsanger saksalemdaktsü.

## Naga Hoho mangpumangyimer: WC, NNPGs

**Dimapur, Aenjeti/January 18 (TYO):** Sen agi alizükdakja tiazü osang prokshiba hadir ka ama akumba mechi Eastern Naga People's Organisation (ENPO), Nagaland Tribes Council (NTC), Central Nagaland Tribes Council (CNTC) ajanga Naga Hoho yutsür mapang talangka lira tir aser tongti zülur ta ajaba H.K Zhimomi aser Elu Ndong nati maneni Naga nungger matsüingdang telungi atsür yia tapi agi o jemisar, ta WC, NNPGs ajanga sangdong ka nung ashi.

Government of India-i Naga nungger entities ana, NSCN (IM) den 2015 küm Framework Agreement zülua aser WC, NNPGs den November 17, 2017 nung Agreed Position zülutepa temogo ta India nung tang sorkar tenteta aliba aser Rahul Gandhi densema opposition party lenirtem aser Naga nungger ajungai angateta

lir, aser iba yongji yimten ken o jembir temi Naga nungger puti otsü, ayak aser yimten yimsüsüba temeden nung kongshia jembishinüteter.

October 31, 2019 nü jembishinü tembangba sülen Naga nungger dang WC, NNPGs Status Paper sayaba ajanga yimten aser administrative arütsü balala süaka Naga nungger ajungai yimtenren asangsang angatetogo.

Tang aliba Naga Hoho ya shidakba Naga nungger asoshi asünungbo, parnoki Indo-Naga political issue indang tangatetba shidak nung Rahul Gandhi ajurua par sasa tali maksü bener marula. Ajisüaka tesüingmangtsüka, Indo-Naga mangatetep asoshi taoba Congress sorkar tenüing asenba parnok ishika yagi Congress lenir den meyoktep aser tang centre nung aliba BJP sorkar aitsü, ta WC, NNPGs sangdong ajanga ashi.

Asüingbo tezüluba yimya balaka asütsü. Parnoki ano Congress party aitsütsü aser Ato Kilonser Modi tenüing sanga jembitsü. Item mapa maka, tashi temeteter ama sayur tamashi nisung temi jembiba angatsü aser azüingtsü ya tang aliba Naga nungger asoshi kangasa tia maka lir.

Asenok semdangba Congress lenir den Naga nungger arok takinüba bener Naga Hoho-i ajuruteptsü nungdaka liasü. Nagaland aser Northeast nung ajaki akumtsüboa aser agizüktettsüsa political solution tekeraba nung nungdaker ta Naga Hoho-i tasü ita Rahul Gandhi dang ashitsü Naga nunggeri nungdaka liasü.

Ajisüaka tia maka, züingsem ajaki Hebron camp atema kisüing jemi, koba Naga nungger arok tangatetba masü. HK Zhimomi aser Elu Ndong nati FA 2015 aser yangji aliba tekolak aser tepen

mangateter aser ajak meteter ama sayur. Parnok dang NAGA HAHA ta ajaba ya tesüingmangtsü mali. Item nisung Naga Hoho tenüing amshiba ya maksü lir. Nisung kar asoshi Naga nungger jeret-peret mezüingmeshia pei poksünga alitsü atema Naga Hoho ya sapang tajung kumogo, ta WC, NNPGs sangdong ajanga ashi.

Naga Hoho ya nükjidong ana nung inyaker, aser mezüingbuba nung Hebron camp nung alirtemi kechi ashir aji Naga Hoho tenüing amshia jembia India nungger lenirtem aser alima ashioaktsütsü meranger. Iba artificial intelligence 'genre' yagi Naga nungger tali ang telemsa adokdaksür. Naga Hoho aser tawa tenüing tulu bener tentetba forum ishika yagi Naga political solution tatem kati arutsü nokdang. Parnoki Government of India mashileni anitsü aser Naga nungger taginüba atsülangtsü zülur.

Naga nungger alidak mangatetep aser telemsa tali adokdaksütsü asoshi parnok alir ta parnoki inyakba ajanga sayur. Adangji parnoki mapangtong nung telangzüba agütsütettsüla, ta ashi.

Tanabuba nung, ajaki mulungtepa yimten ken o jembishinü tembanga aliba nung tim masüba agenda tem benoktsü merangba ya tesüingmangtsüka lir aser iba yagi Naga nungger mera keta, tushia aser akumtsüboa alitsü temeden angutsü ang menudaktsür. Iba menudaktsüba business nungi shiba ajangzük? Naga kin kata maliba mesüra Nagaland mesüra tezülen 'territorial influence' kecha maliba Naga Hoho ama lokti tentet ka nem mangpumangyimba lenmang nung Naga nungger maneni anishidaktsütsü asü? ta WC, NNPGs ajanga asüingdang.

(Maneni tapak 2 nung...)



## NIC-i Hybrid Mode of Hearing amenokogo



**Dimapur, Aenjeti/January 18 (TYO):** Right to Information (RTI) ajungkettsü nükjidong nung Nagaland Information Commission-i January 18 nü New Nagaland Commission Complex, Kohima nung Hybrid Mode of Hearing amenokogo. Iba ya Chief Information Commission I Meyionen Jamir-i tenzükja liasü.

Commission-i, hybrid mode hearing ajanga ochi obendang agütsütsü asoshi technology koda tongtibang iba indang lemsatepba den litigant tem tashishiba aser temepeshiba angadangtsü atema hybrid mode hearing ka amenoktsüogo. Iba ajanga tashishiba aser temepeshibatem e-file asütsü asoshi litigant ajak nem maongka agütsütsü.

Nagaland Information Commission kübok tashishiba aser temepeshibatem Video Conferencing ajanga angadangtsü asoshi studio ana lir aser iba ajanga applicants/

appellants/ complainants tem aser talisa kinük nung alirtem nem Kohima mesüra Nagaland Information Commission office bushia moi pei kidang nungi ken o angadangtsü asoshi maongka agütsütsü.

Maneni applicant temi Commission indang hearing ya tsüngtong oa mesüra Google Meet, Zoom, Cisco WebEx or Bharat VC amala Mobile application tem amshia online ajanga ken o angadangtsütsü.

Iba den applicant temi Video Conference Studio tem kecha tetsükdaktsü makai amshitetsü, koba district Headquarters ajanga nung National Information Centre office ajak nung amenoka lir.

Ano Supreme Court tetuyuba nung Commission dangi second Appeal aser tashishiba tem online ajanga file asütsü asoshi e-service portal (taoba mapang e-district project) facility agütsüogo, koba <http://service.nagaland.gov.in> ajanga portal nung register süa

develop sütettsü.

Commission-isa, state nung Public Authorities ajak indang FAA, PIO aser APIO tem indang e-mail aser mobile number tem bendenogo. Iba ajanga second Appeal mesüra tashishiba tem online nung temalen shisema aliba portal/link ajanga Commission dangi file asüba mapang FAA aser PIO tem nem metetdaktsütsü.

Online ajanga second appeal mesüra tashishibatem benokba mapang applicant temi parnok indang RTI application mesüra first Appeal kechi südir süaka benoktsüla aser shitakba Public Authority nem tashishiba agütsütsü asoshi kanga kümdanga inyakttsüla.

Temalen shisema aliba facility tem ya Commission nung angutsü aser lisopurtemi physical mesüra virtual mode shimtetsü. Ajisüaka second appeals aser tashishiba physical filing-a virtual mode den külemi maneni inyaksangshitsü.

## Kohima DC-i NGO & Club tem nem osang agütsü

**Dimapur, Aenjeti/January 18 (TYO):** Taruba 74buba Republic Day dak sendakba nung Kohima Deputy Commissioner, Kumar Ramnikant-i, item NGO aser Club tem dang item tesemtem semdangtsü asoshi tetuyuba agütsüogo.

1. State Mental Health Institute - Gorkha Public Panchayat, Kohima, 2. Kohima, Orphanage & Destitute Home - Hindu Mandir, 3. District Jail - Kohima Chamber of Commerce and Industries,

4. District TB & Chest Disease Hospital Khuzama - Rotary Club, Kohima, 5. NHAK - Nagaland Motor Cycle Club, Kohima Chapter, 6. Old Age Home (near Relit) - Puliebadze Club, Kohima, 7. Bright Morning Star Orphanage Perizie near IG Stadium - Nagaland Contractors & Suppliers Union, Kohima, 8. Leprosy Colony (Naga Bazaar) - Indian Red Cross, Kohima, 9. Kirpa Foundation - Nagaland Adventure Club, Kohima,

10. Cradle Ridge - Hindu Kalyan Samithi, Kohima, 11. My. Gilead Home - Classic Club Kohima and 12. Parade Ground nung nanglong alemtsüba- DC's Office, Kohima Dobashi tem.

Kasa sangdong ajangasa NGO aser Club tem dang parnoki jenjang agiba indang osang agütsütsü metetdaktsüogo. Maneni DC-i, NGO/Club temi osang agütsüba dak ajemdaker Commendation Certificate agütsütsü ta metetdaktsü.

### GOVERNMENT OF NAGALAND DIRECTORATE OF HIGHER EDUCATION NAGALAND: KOHIMA

NO.HED/SCHO/2022-23/

Dated, Kohima, the 18th Jan. 2024

### INFORMATION ON POST MATRIC SCHOLARSHIP (PMS) FOR ST STUDENTS OF NAGALAND

This is to inform all the beneficiaries of the Post Matric Scholarship for ST students (2022-23) whose names are on the beneficiary list but have not received their scholarships due to dormant/invalid/inactive bank account scan send his/her active bank details through the link/QR code given below.

Based on the administrative approval of the Government, claims should be made within 90 days i.e. on or before 18th March 2024. Beneficiaries failing to claim within the stipulated time will lead to forfeiture of the scholarship and no further claims will be entertained.

<https://forms.gle/LfxyZrZkroegpdsy5>.



Sd/-  
(Dr. N. NSHENA NEKHA)  
ADDITIONAL DIRECTOR  
HIGHER EDUCATION  
NAGALAND: KOHIMA

## Tuensang DC-i senzüsenpongertem nem tetuyuba agütsü

**Dimapur, Aenjeti/January 18 (TYO):** Tuensang Deputy Commissioner, Lithrongla Tongpi Rustsa-i sangdong ka ajanga, Yangli aser Mangakhi na tsüngda Hamilton Bridge yanglushia aliba dak sendakba nung January 19 nü anepdang 6:00 ako nungi nikongtsütsü 6:00 ako tashi gari kecha senzüsenpong masütsü

tetuyuba agütsüogo. Senzüsenpongertem dang January 19 nü teküboklen agüj aliba lenmangtem nung senzütsü tetuyuba agütsüogo.

1. Tuensang - Yangli - Suruhoto - Zunheboto.  
2. Tuensang - Yangli - Suruhoto - Longsa - Mokochung.  
3. Tuensang - Longleng - Changtongya - Mokochung.

## PCC-i metetdaktsür

**Dimapur, Aenjeti/January 18 (TYO):** Patkai Christian College (Autonomous)-i sangdong ka ajanga, college küm 50 ajungba nungdem nung küm tepeyong sentong balala agütsü renemer aliba tetenzük sentong January

20 nü 2:00 ako nungi tenzüka Bundrock Chapel Auditorium nung agütsü, ta metetdaktsüogo.

Sentong ayongertemi alumni aser tejangrar ajak iba sentong nung shilem agütsü pelashishia jaokogo.

## Thonoknyu nung VBSY sentong agiogo

**Dimapur, Aenjeti/January 18 (TYO):** Thonoknyu Sub Division kübok Chillitso yimtsüng atema Vikshit Bharat Sankalp Yatra 1buba session January 18 nü Chillitso public ground nung agiogo.

tajangshibatem lemsatepba sentong nung dena aliba department ajaki lemsatepba liasü. Sentong nung Secretary Chillitso-i tepela o jembia liasü.

Tanabuba session ya Thonoknyu yimtsüng nung agi, kong VCC Thonoknyu-i lokti pela agizükba o jembia aser VDB Secretary-i tepela o jembia liasü.

Iba sentong ya SDO Civil Thonoknyu Tsatsusei-i Day Nodal Officer ama len ania liasü. Sentong nung VCC Chillitso-i lokti pela agizükba o jembia liasü. Sentong nungsa Ato Kilonser-i jembiba o mangaoa yur aliba nüburttem dang sayu aser tenangzüktepba agia liasü.

Sentong nungsa NSRLM Thonoknyu-i sobaliba ken aser tsüngsang saya liasü. NSRLM Thonoknyu nungi tetsür takok angurtem nem tetushi agütsü aser iba den one stop free medical camp-a ka ayongzükba agia liasü.

Maneni takok tajung anguba beneficiary temi parnok

## Tsüngkamnyu benjug shibangba sentong MLA Imtichoba-i maotsü



**Dimapur, Aenjeti/January 18 (TYO):** Yimkhiung nunger benjug Tsüngkamnyu January 15 nungi 17 tashi Yimkhiung Heritage Village Mündün nung takok ngua mungogo.

Benjug shibangba sentong nung MLA aser Chairman, DPDB Tuensang Imtichoba ajakteta jaoker liasü.

Sentong nung o jembiba mapang pai, Tsüngkamnyu benjug ya tai toktepba benjug ka lir ta shia sentepa aliba lokti dang benjug amungba mapang temesepba mozü dang ma ta ashitsü aser 'Tsüngkamnyu' dang hai ta ashitsü ayongzükba liasü.

Benjug host S Advisor, Fire & Emergency Service, Home Guard & Civil Defence. Kiusumew Yimchunger-ia

nüburttem ajungshi aser temesepba mozü achiba nungi pila alitsü ayongzükba liasü.

Sentong nung SP Shamator Khruosutho-ia o tatsüka jembia aser Vice Principal St. Joseph College Jakhama Rev. Fr. Obed Yimkhiung-i Tsüngrem temaotsü meshizüka sarasadema liasü. Sentong nungsa Vice President Convenor Local committee Hanji-i lokti pela agizükba o jembia, Ashi aser Ayin Yimkhiung nati Tsüngkamnyu Thüshiso sentong agi aser Leangkonger yimtsüngi sobaliba ken ka tena liasü. Maneni Social & Cultural Secretary YTC & Member secretary Local committee Kinan-i tepela o jembia liasü. Iba sentong ya YAA tir Keyongkhum lenisüba nung agia liasü.

## Naga Hoho...

(TAPAK 1 NUNGI...)

WC, NNPGs ajanga Naga nunger matsüngdang 'negotiated status paper' yuja lir. Naga kintem, state sorkar, civil society tem aser Naga nunger tashi tawar temi temulung süa agizükba lir. Solution sülen political aser administrative inyakyim ajanga tajungtiba nung asameyanga lir. Manipur, Arunachal Pradesh, Assam nung

akhi mapang nungi Naga nunger aser Naga nunger li jungiunga wazüka yua lir. Government of India-i par tangatetba tejangja metetdaktsüogo. Pei agütsü mechi Indo-Naga political solution raksatsütsü aser atsülangtsü merangertem puti otsü tammang len alitsü, ta sangdong ajangasa ashi.





January 18, 2024 nü Hyderabad nung aliba Begumpet Airport nung Wings India 2024 tetenzük sentong nung Union Minister for Civil Aviation Jyotiraditya Scindia, Minister of State for Civil Aviation VK Singh, Ministry of Civil Aviation Joint Secretary Asangba Chuba Ao, Telangana Minister K Venkat Reddy aser tangartem tangokba noksa nung angur.

### NITI Aayog-i sangdongba sensak tia report Congress-i aitsür

**New Delhi, Aenjeti/January 18 (Agencies):** Anoogo ishika tejaklen Niti Aayog report ajanga, tesüiba küm 9 tsüingda India-i nisung crore 24.82 kanga sensak tia nungi anitetogo, ta sangdongba osang Congress-i aitsüogo.

Congress-isa, iba ya nisung aika nem welfare schemes aser angati ration magütsütsü nükjidong nung yangluba asalentong lir, ta metetdaksü.

NITI Aayog report ajanga, 2022-23 tashi nung nisung crore 24.82 dak tema kanga sensak tia nungi anitetogo aser sensak tia nungi anitetba nütsüng teimtiba state temji Uttar Pradesh, Bihar aser Madhya Pradesh state te lir, ta sangdonga liasü.

Brihostibarnü New Delhi nung aliba AICC headquarters nung osangbenertem den jembidang Congress party otongdar aser social media department nung tongti, Supriya Shrinete-i, nisung crore 24.84

lenla balala nung kanga sensak tia nungi anitetogo ta sangdongbaji tiyazü aika rongnung tang tasentiba lir, aser election matong tashi yamai tiyazü osang sangdongtsü, ta ashi.

"Ochi nungi pilabaji iba ama talangtiba malitsü aser NITI Aayog-i iba ya asadantetbaji sensak tia asadanga lenla melenshiba ajanga lir. Iba dak alia World Bank aser IMF-ia iba dak sendakba kecha memetetdaksü," ta Congress lenirisa metetdaksü.

"Iba report ya NITI Aayog-i renem, parnoki survey agia iba osang sangdong saka atangji nungbo ibaji shidak masü," ta lai ashi.

Iba survey ajanga mapa manguba tebilemtsü shia mali; atangji nungbo osettsüset aser chiyungtsü jenjang kanga tuogo, mapa manguba tebilemtsü lir, income inequality lir, taa ajemogo aser kanga sensak tia lir, ta laisa metetdaksü.

"Iba report ya linük nung

sensakertem anema asalentong ka yangluba lir, kechiyong nisung crore 25 bo 'sensaker masü' ta sangdonga sorkari agütsüba teyari joko magütsütsü," ta lai ashi.

"Joko parnoki subsidy mangutsü, angati ration mangutsü aser sensakertem nem agütsüba welfare schemes magütsütsü. Iba asalentong atema onoki shisabulutsür," ta lai metetdaksü.

"Kanga sensak tia shilem 11.7 tashi ajema alur süra sensaker nütsüngji crore 15 dang lir, süra kechiba sorkari nütsüng crore 80 nem angati ration agütsür," ta lai asüngdang.

NITI Aayog indang report ji third party shinga-ia pu-masemer, iba reoprt ya shidak asübo World Bank aser IMF-ia iba report pu-semle, ta lai ashi.

Shrinete-i, Congress-i aniba UPA sorkari nütsüng crore 27 sensak tia nungi anitet aser ibaji shidak ta World Bank-ia pu-sema liasü, ta metetdaksü.

### Ayodhya sentong nung medenra opposition akoksatsü: Hema Malini

**New Delhi, Aenjeti/January 18 (Agencies):** Brihostibarnü BJP MP aser taoba mapang actress, Hema Malini-i, January 22 nü Ayodhya nung Ram tekülem ki semzükbä sentongji temenungratsüka asütsü, saka opposition party temi iba sentong nung medenra parnok dang takoksa angutsü, ta metetdaksü.

Osangbener den jembidang

Hema Malini-i, "Opposition party temi iba sentong nung madentsü ta jembir, ibaji ajanga parnok dang takoksa angutsü. Parnoki Ram ji ajak meyong ta jembir, ibajia kanga junger," ta ashi.

Hema Malini-i, "Ayodhya nung terenlok mapa kanga inyakdar. Hotel aika lapoker. Onoki iba tesem semdangtsü atema bilemdang kong

anenzüktsü ta bilema liasü. Tangbo Ayodhya ya 'world-class' tesem ka kümogo," ta metetdaksü.

Laisa, January 22 nü ayongzüka aliba sentong ya Ram tekülem ki atema nokdakba mapang asürtem ajak nem akhüm agütsüba sentong ka asütsü; tangbo iba tekülem ki yangluogo ta meteta parnok tanela pelaa alitsü, ta ashi.

### EAM S Jaishankar-i India tenüng nung NAM Summit nung adentsü

**New Delhi, January 18 (Agencies):** External Affairs Minister, Dr. S Jaishankar-i India tenüng nung Uganda linük yimtiba, Kampala nung ayongzükbä Non-Aligned Movement (NAM) senden nung adentsü; iba senden ya Hokolbar nungi tenzüksü.

Brihostibarnü Ministry of External Affairs (MEA)-i sangdong ka ajanga, Jaishankar-i Uganda aser Nigeria na semdangtsü aser NAM movement nung züngsem ka ama India-i iba telok tangatetba nung inyaktsü, ta metetdaksü.

Uganda leniba nung NAM senden nungji tang terenlokdak linük 120 dak tema adentsü, ta MEA-i metetdaksü.

January 21-22 anogotem nung Kampala nung 'G-77 Third South Summit' nung India tenüng nung Minister of State (MoS) for External Affairs, V Muraleedharan adentsü.

"January 19-20 anogotem nung Kampala nung ayongzükbä 19buba Non-Aligned Movement senden nung External Affairs Minister S Jaishankar leniba nung India nung ketdangsertem adentsü," ta MEA-isa


metetdaksü. Iba summit omenji 'Deepening Cooperation for Shared Global Affluence' lir. NAM ministerial aser senior officials level nung senden amenba sülen tang iba senden ayongzüker.

NAM foreign ministers' senden nung India tenüng nung Minister of State for External Affairs, Rajkumar Ranjan Singh adentsü.

NAM Summit aliba mapang nung Jaishankar-i Uganda nung lenirtem aser NAM züngsem linük balala nungi lenirtem den jurila senden amentsü tebilemba lir.

Jaishankar-isa January 21 nungi tenzüka anogo asemnü Nigeria semdangtsü aser iba mapang nungji Nigeria Foreign Minister o Jaishankar na leniba nung 6buba India-Nigeria Joint Commission Meeting (JCM) senden amentsü.

Jaishankar-isa 3buba Nigeria-India business council senden tenzüksütsü, business lenirtem den senden amentsü aser Nigerian Institute of International Affairs nung o jembiba sülen Mahatma Gandhi kürakyanglu ka semzüksütsü.



January 18, 2024 nü New Delhi nung Ato kilonser Narendra Modi-i Ram Janmabhoomi tekülem ki nungtem nung postage stamps aser stamps indang kaket sayatsü dang tangokba noksa nung angur.

### Vadodara nung rong lendong nung tesayur 2 aser kaketshir 12 asü

**Vadodara, January 18 (Agencies):** Brihostibarnü Uttar Pradesh state kübok Vadodara nung aliba Harni awatsüng nung rong ka meküpbokba lendong nung tesayur ana densema school tanurtem aika süogo.

New Sunrise School nungi kaketshirtemi tesayurtem leniba nung picnic oa liasü saka tia makai iba lendong atalok.

Ketdangsertem ashiba agi, iba lendong nung tesayur ana aser kaketshir 12 süogo.

Iba osang angashia Ato kilonser Narendra Modi-i mangyim jashi lemsatepba den külemi takoksa angur kibong shia nem senotsü teyari agütsütsü ta sangdongogo.

Prime Minister's Office-i sangdong ka ajanga, "Vadodara kübok Harni awatsüng nung

rong meküpbä lendong nung asürtem atema ni jashia bilemtsür. Tang ama mapang ka nung ni mangyimertem kibongtem den tejashi lemsateper. Yirua alirtem tekeraba nung anepjang ta sarasadentsür.

Local administration-i akokba tashi teyari agütsüdar. Asürtem kibong shia nem PMNRF fund nungi sen lakh anana teyari agütsütsü aser yirua alirtem shia nem sen 50,000 teyari agütsütsü," ta metetdaksü.

Osang angazükba agi, lendong atalokba mapang nung iba rong nungji nisung 30 jungnüa mena liasü.

Vadodara District Collector, AB Gor-i, lendong atalokba mapang nung rong nungji school tanur 27 mena liasü, ta metetdaksü.



January 18, 2024 nü Kartavya Path, New Delhi nung Central Industrial Security Force (CISF) tetsür sepaitemi Republic Day Parade atema renemshidang tangokba noksa nung angur.





## TIR YIMYIM YIMOBILEM (EDITORIAL)

DIMAPUR ROGONÜ, JANUARY (AENJETI) 19, 2024

### Balala ali tajungba !

**N**isungtem ya külemi alitsü yanglu saka nisung ajak ki ka nung külemi alitsü makok, anungji tain kümerbo kibong küma aoer aser kibong balala ser ki balaka nung alir. Ajisüaka, ki balala nung aliba agi adianu kinunger aser tangartem den külemi malir ta masü saka tepela aser tejashi mapang ajak nung külemi yaritepa alir. Aji oda, kinunger adianu asüyonga ki ka nung külemi aliba agiang meputep adoker. Iba jagi tsüraburtemi kinunger den asüyonga külemi tesem ka nung lia masü saka lilang nungi jungtepba agiang tali teputepba akümer ta jembir. Iba mesükji tanü Naga kintem ya temetena aliyonga kin ka ser yimten ka kübok alitsü agibo yimten balala kübok ser Naga nung putepa ali tajungba asütsü. Tanü Naga nung meputepba ya, ashiko, külemi aliba ajanga lir. Naga nung ta asüba kin shingaia Naga nung mesünüba aser Naga nung agi nümamedangtetbabo mali saka Naga nung puteptsüsa tasakba. Iba jagi Naga nungertem tentetba lokti tentetsa teimba saka Naga kin ajak adenba lokti tentetbo kata mali, kechiyong lokti tentet ka kübok Naga kin ajak melongjemteter. Ibaji tesümangtsüka aser tangatetsü tasak. Iba timtem ya Naga nung ajaki angur aser angtetter. Anungji, iba tangatetba nungji Naga yimten tebilemsü ya yakta latetsüla aser Nagaland anüdoklen alir Naga kintemi akangba ama parnok nema state balaka agütsüsa tajungba asütsü. Idangji dang parnoka pei lima asoshi inyaksü atema tali khuretsa bilemsü aser terenlok mapatem tajungba inyaka otetsü. Tang yabo Nagaland nung alir nübertem asoshi yimten telemtetbatem ajak Kohima nung agir aser Kohima nungi dang terenlok mapatem repranga anepalur, anungji Kohima nungi Mon, Longleng, Tuensang, Kiphire aser Noklak nung alirtem nungdak kangabo junga mereprangtetter asütsüa akok. Iba jagi Nagaland anüdoklen alirtemi Nagaland government anema temulung machi o kanga jembir. Aji tiyazü masü shitak, kechiyong tang tashi nung Mon nung mozü ki yanglutsü tenzükba dak alaka Nagaland anüdoklen kecha nung Nagaland ajaklen nungi bushia oa azüngtsü aser inyaksüsa kecha yangluja mali. Kasa state-sa süaka terenlok mapatem nung liromemedembaji aji lir. Ajisüaka, ano külen bilemdangtsüba kaji, Nagaland anüdoklen alirtem nungia nübertem nungdak repranga inyaksütsü atema yimten yimsüsürtem tangar Naga kintem nungi shimba ama kasasa shimer. Itemji assembly nung dang masü saka parliament-i dena yoker. Tanü shitakba Nagaland anüdoklen alir nübertem Nagaland nung terenlok mapatem inyakba nung liromemedemba indang temulung mechii lira, ibaji tangar kisüng tai masü asenoka tai asütsü. Iba taiji tagitarutsü oset amai ka ser lemsara, atangji, anüdok aser anülü kecha mali yimten yimsüsürtem ajak kasasa atahtsü. Anüdok aser anülü kecha mali, pei lima aser pei nübertem meimra, kechi mapa inyaka lidir liaka pei nübertem den külemi lia yaritepnütsü. Aji oda, temeten aser maongkabo aginer saka nübertem asoshi khuret mebener ta asüba nisungtemi pei lima aser pei nübertem tenzüka parnok alidak melinütsü. Mahatma Gandhi-ia England nung aser South Africa nung lia India yimten temeten indang jembia asübo, koda süla ? Ibaji kodang asenok den medemdanga bilemdangdir, asenoki asen nübertem meimba agi temeten bushir masü saka asen kisüng ajangzüksü asoshi bilema inyaker amai inyaker, anungji asenoki nübertembo mebushir saka temeten bushir. Iba ama shisatsü, koba agi asenoksasa asenok külaoktsür, ibaji endoker asenok Naga nung ajak putepa, meimtepa aser yaritepa alitsü atema alima tilala süaka yimtenbo balala ser alitsüsa anüdok aser anülulen alir Naga nungertem tangatetba tasen kati arutsüla. Aji oda, kinunger agi pi kümer meputepsa alitsü agibo Nagaland aser Manipur agi anana asemsem kümer, yimten balala kübok Naga nung longjema aliba tajungba asütsü.

## OLEMSABANG

### RONG RONG ADOKTSÜLA ASÜ ???

~ Süpongnüsang Longkümer  
Darogapathar Dimapur

Kü tangatetba nungi olong temeyoktep kar lmsatepnür, saka tamasa ocet azünger ajak dangi küm tasen salem metetdaksür. Alima ajak nung tamang yimsü ka agi amokbang kin malitsü südi ta bilemer, yamaji Naga lima ya-a karbo yimsü palaka alitsü-a akok aser Tsüngrem dak mamangtettaka nibo khristan masü ta oula adokerbo mangashir, tsürapor tamang agi Naga lima khrista asoshi ta ayimoktsüba nung shingaia onokbo matentsü ta kangkokangji angashia maru oupang ka nung nokdaka lir, ya Tsüngrem temoatsü. Tsüngremi Mosa ten jembia pai süngsem nungi milak agi aser mepet nungi jembia aru ashe tejak jitepba jambiba Laishiba nung mangur. Yamaji Otsüla obuola nung mapang-a Lijaba jak shingaia mangu shibai mojing ngudir ku ajak tsüdoka shirangba agi Tatemzüki aoba ajurua aru. Asen kümtetdakba Khrista Meimchir kümer alimai aru anungji Par mapanga noksa yanglutetter lirapang Pa noksapo yanglutettsü südi ta yimlar. Naga lima nung khrista dak mamangtetter aika alitsü akok saka khrista lima, Israel limaji-a tanü tashi khristan ishika tang ta angashir, saka lipokdang nungi Tsüngremi shimtetba lima, timtem aser lendong tulu ataloktsü akok saka Tsüngremi kümzüksü Laishibai ashir. Yamaji ni tamang nung tashe meite liaka Naga lima nung aser asen Aor tamangtir aika ali nung Sodom amabo mesamatsütsü südi ta tamang agi sarasatema atar.

Tanü asen Aor, mesüra Naga nung arogotem nung telemsa aika adokba angur aser angashir. 1976 nungi asentenshi tulu adoker bei adenba arogo nung janra matemba ajanga NCRC aser telok tilatari aika tentetta adokba angur. Khristai kir benjong daki ajar saka tarur mali anungji tajung majung ajak jar arung kilirtem yoka anir aru saka item rongnung kir sü mapenba nisung ka ngua chubai pa tetsüng tepen alenür tammangdak yutsüba shia angur arogo maparen pentenba nung tama inyaksü inyakbatem kiyimsangi makizüksü Mth 22:1-14. Arogo kibur chubatibai benjong renema yur kir kidangi jaoker nung tenla kidangi shinga marutet kubanga yur kima nungi Tsüngrem ou jembia nung kiburi pelatima ta asüngtanger..Baptist arogo nungi aika razüka oa alibatem aseni ou mebendanger saka mongdang inyakyim agi tsütateptsü memelar südi. Baptist arogo nungi Para arogoi aotsü atema tzüsenba kulizüng magütsütetter kechaser mongdang palala, aniasüngtsü atema baptist arogo nungi razüka aortem züngsem pelena yoktsü inyakyim agi memelar ta ataloka angashir asenoki aji tim-a ta akizükti kechaser mongdang nungi razüka ogo. Yamaji ano tasüngtangtsü kaji baptist arogo Sannüker mesüra ABAM ajanga ordained sütsüba chirtem kar Para church nung denra tsüraportemji kechi jenjang nung ABAMI yutsütsü? Filipi nung Paul aser Sila sayüsüngia jajatang tiyazü ainketer kilitsür ka dak nungi la ainji samadaktsüba ajanga Paul aser Sila tepokdak shibanga ayuba aonung Tsüngrem tang sarasatema alitang aoksa menoknok tuluka anoka tepokdak kishe ajak lapok aser tena merangser ajak sala adok. Kishinüksangji mejanga aliba nungi sakdang kishe ajak lapoka ngur tepokertem janaogo ta bilema pa sasa tepsettsü lia Pauli onok ajak yangi lirgo nü sasa tamajung teinyak ta ayimoktsüba ajanga paji tasüba nungi-a kümzük aser tekümtet ngudaktsü. T M 16:16-31 nung angutsü Iba mapa ya tekümtet tejangja akaba aser metetba mapa lir. Sürapang tanü Dimapur nung asen Aor arogo nung tang asü mesüra tangar kin arogo tenlaki nunga ali mali mejangja saka asen Aor tenlaki aika nung CCTV alenloka lir Ibai Tsüngremi mulungba tamang mapa asü ? Hon agi yangluba liangmesen arongba su amba kotak tenyar tangar ka aru, aser chuba menden madang aliba hon tekülemdak manung temeshipur ajak sarasatem meyoktepdaktsütsü pa nem liangmesen jendi agütsü.JA 8: 4. Aron japasu Nadab aser Abihu nati miteptsü pena arua iba manung mi aser liangmesen inoker kibuba nem tenla agütsü saka iba miji temeshi masü,kechaser kibubai yamai inyaksü parnok dangmemela anungji kibuba mi yoka parnok idakji kibuba madang mi agi rongset Levi 10: 1,2. Arogotem nung rongrong adokdaktsütsü Mojing sendong tulu arur anungji bei sasa kümtanga angatetsü mapang tongogo Sarasatem nung tali tashe itshidi ta ayongzüker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# Tenla ki arongba lendong nung jakrep pastor ana asü



Portland, Oregon nung aliba Word & Spirit Arogo nung pastor aianu jakrep- Kimberly Hjelt aser Stephanie Hjelt na noksa nung angur.

**January 18, 2024:** Portland, Oregon nung aliba Word & Spirit Arogo nung aianu jakrep pastor ana asüba sülen kinüngertem aser Arogo züngsemtemi tena atema mangyindar. Amongnü (January 14) Tenla ki arongba lendong nung jakrep pastor- Kimberly aser Stephanie Hjelt na asü; tena arrshi küm 76 liasü.

Osangbener den jembidang Portland nung fire investigator kati, aianu naji Tenla ki gymnasium tema nung aliba kidang telidak liasü; yipru ajanga ghonda 13 shi kiyong nung light maruba ajanga generator amshiba mapang nung mi lendongji atalok, ta metetdaksü.

"Building nungji generator tamshidak liasü," ta Portland fire investigator, Craig Gault-i ashi. Word & Spirit Arogo Tenla kiji 6140 Stanton St., Portland, Oregon nung lir aser iba Tenla ki building ya ayoktsü sangdonger liasü, ta Arogo nung media & security in charge, Tim Duclos-i metetdaksü. Pai tesüiba küm 23 tashi pastor

anaji meteta liasü.

Duclos-isa, aianu pastor anaji tenzükbä wadang nungi anisüngzükbä sülen Tulsa, Oklahoma nung alitsü tebilemba liasü, ta ashi.

Arogo indang website nung shia aliba agi, Kimberly Hjelt ya senior pastor liasü aser Stephanie Hjelt ji executive & youth pastor liasü.

Duclos-isa, tawa Kimberly Hjelt yiruba agi labo teyari oset amshia dang jaja liasü, ta ashi. "Tena pelaa dang liasü aser tangar teyarini liasü," ta pai ashi.

Mongolbarnü Stephanie Hjelt'er jala, Jessica Russell-i Facebook post ka ajanga, "Kü temeim kütsü aser 'auntie'na taoba hopta tatembanglen kotaki ogo. Tena kanga kera oadokogo. Temang pilayonga tena Kibuba den lir. Tenati atangji Yisu kanga meima liasü," ta metetdaksü.

Laisa, "Tena memorial service indang ni kobi melii lemsateptsü. Onoki February 16 nü iba sentong agitsü saka

tesembo ano melemtet," ta metetdaksü.

Taoba mapang Arogo nung züngsem Samantha Jacobs-i tena nem tetushi agüja, "Nenaprong kotak kikümbang adena iadokogo ta osang angashidang ni kechiang-a mejembiteti aküm. Tasütait pastor ana mali asübo ni tanü iba jenjang nung ya melila. Tena ama ochishir pastor aika mali," ta ashi.

"Tenla ki dang masü saka Kibuba yimli nunga nisung aika adenshitsu atema tenati kanga nendaka inyakogo. Nisungtem ochi lenmang nung jajatsü atema tenati tatishitsu tajung yutsüogo. Tenati ni meimba aser ni agizükba atema ni teti tena dang pelatsü. Tena oadokogo ta bilema ni jashir, ajisüaka tena kotak nung külemi lir, kotaktenyartem den külemi ken tendar aser Tesayur tajungtiba dang nungi angazükdar, ta meteta kü melung süneper! Pastor Stephanie Hjelt aser Kimberly Hjelt, ni nena meimer," ta Jacobs-isa lemsatop.

# ANOGO ABEN TSÜNGREM DEN

## Tsüngremer telangzüba mission sapi

*Oba, na kechi koda kü dak lir aser ni Ne dak lir, yamaji parnoka asenok dak lidakjang, anungji Nai ni yok ta alimai amangtsü. Yohan 17:21*

Samaa aliba lima alangzükbä mission nung Tsüngremi aiben meimchir tesendaktepji shilem ka ama jembir (Yn. 13:20; Matt. 25:40). Kuli kaji temeshi metsü, aji chirtem tajung sotetsü aser parnoki Tsüngrem dang tashi angatsü aser parnok Tsüngremer mission nung amshitetsüsa alitsü (Mal. 2:14-15). Kasaji, arogoji Khrista temang lir. Arogo nung Tebu den mission ka nung alitsü makok (1 Kor. 12:12). Asen meketa alir tekümtet asoshi asenok o asenok na tsüngda tesendaktepji kanga tongtipang lir.

Yisu kangki-i matudang Pai nütsüngtem tasü itta alitsü, mesüra tamang katetta alitsü, mesüra Pai kechi sayu aji bilemteta alitsü sarasademer alitsü ta asenoki bilemtsü akok. Aji saka Pai parnok kati ka den meimtepa alitsü sarasadem. Tsüngrem meimtsü saka tangar dang memeimshitsübaji tanelaren tamakoktsü ta Yisui angatetta liasü.

Nai Tsüngrem meimba tetentangbaji nai tangar dang meimer asü masü aji shisadangtsüba lir. Asenoki ashir, "Kotak nung aliba Obala, tebilemtsü Na aser ni tsüngda nung masü. Ni kü mulung ajak agi na meimer. Ni tangar dang memeimtetter." Aser Tsüngremi ashir, "Ibaji tamakoktsü. Tangar, shirnok asoshi Kü chir asü parnok dang memeimra nai Ni meimtsü makok" (Yn. 13:34-35). Na meketa aliba khristantem den lungjema melira nai Khrista dangi tangar anir arutsü makok.

## Yaküm alima tesem ajaklen Tenla ki aser Arogo kiojen aika amak

**January 18, 2024:** Sub-Saharan Africa densema alima tesem balala nung Khristantem samatsüsa tensa ka nung lir, ta Open Doors-i metetdaksü.

Open Doors-i indang World Watch List 2024 nung alima nung Khristantem tamajungtiba reshikangshiba linük 50 rongnung linük tasen züngsema mali, ajisüaka taoba report den medemdangra Khristantem reshikangshiba jenjang tamajungba kümogo.

Yaküm küm indang report February 3, 2023 nü sangdonga liasü saka takümbo iba report kanga kera sangdongogo.

2022 küm alima tesem balala nung Tenla kitem, Khristan school tem aser Arogoi ketdangtsüba hospital tem amakba den medemdangra yakümbo item ama tatalokbaji tenetben agi teimba liasü. 2022 küm Tenla ki aser Arogo kiojentem amakba tatalokba 2,110 dang liasü saka 2023 küm nungbo item ama tatalokba 14,766 liasü.

Iba dak alia Khristantem meyong ki amakba-a shilem 371 agi teimba kümogo. Tang alima nung Khristan 7 shia nungi katibosa reshikangshi ajangshir, ta report nung shia lir.

Tesüiba küm 30 tashi küm shia World Watch List renema sangdonger, aser iba report ya lenla trok asadanga renemer. Lenla trokji- nija taküm, kibong, lokti, linük, Arogo aser raraba tensa asadanga renemer.

Taküm World Watch List report ya October 1, 2022 nungi September 30, 2023 tashi nung alima tesem balala nung reshikangshiba asadanga renem.


Alima nung Khristantem tamajungtiba reshikangshiba linükji North Korea lir aser Pakistan-a jenjang 7buba nung lir. Yaküm August ita nung Pakistan nung Tenla ki 21 rongdokja liasü aser Khristantem meyong ki noklang aika rongdoktsü, ta Open Doors report nung shia lir.

Open Doors-isa, alima nung tamangba yimsü temeden atema raraba nung lenirji UK sorkar lir, ta shia UK sorkar nem tenüngsang agütsü.

Ajisüaka Open Doors-i, Prime Minister indang special envoy menden ya permanent asütsüla; tarutsü nung iba menden ya teti alitsüla, ta metetdaksü.

Tang Prime Minister indang special envoy ji MP Fiona Bruce lir.

# Kenya nung pastor Mackenzie anema nisung tepsetba ken o benokogo



Paul Mackenzie

**January 18, 2024:** Kenya linük nung Khristantem aika sarasadema lumiseta südaktsüba ken o dak sendakba nung pastor Paul Mackenzie anema nisung tepsetba ken o benokogo.

Good News International Church tentetsang, pastor Paul Mackenzie den tai tonglokja alir nisung 94 nungi 30 anema Malinda nung aliba High Court nung January 17, 2024 nü ken o angadangogo.

Nisung 429 tepsetba ken o dak sendakba nung pa anema ken o benokogo. Tanurtem densema tasümgang aika Kilififi county kübok Shakahola arem nung rema aliba nguteta liasü.

January 17 nü Court nung pastor anema ken o angadanga mapang nung osangbenertem den jembidang Malinda nung Bishop Willybard Kitogho Lagho-i, iba ya tarutsü nung nisungtem atema tansütsü otsü lir, ta ashi.

Putir Lagho-isa, "Iba ya sensotem, linük aser Arogo lenirtem saaksalemtsü mapang ka lir. Senotsü ajangzüksü aser yimtenren nung tajangzükbä angutsü atema tim masüba nung tamangba yimsü amshiba nungi Kenya nung sensotem kümzüksüla," ta ashi.

Yaküm pastor Paul Mackenzie-i par züngsemtem dang, 2023 küm April 15 nü alima tembangtsü, anungji iba anogoji matongdang Yisu ajurutsü atema lumia sarasademang, ta ayongzükbä sülen nisung aika lumia sarasademang asü.

Ano karibo pei osettsüset aser kiojen yokdokba den mapa toktsür pastor Mackenzie aliba tesemi oa liasü.

Iba tatalokba osang jungkai adokba sülen police-i pa pua Mombasa nung aliba Shimo la Tewa jail nung anogo 278 ayu. Iba mapang piyong item tatalokba bushistügdanga liasü.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Shirong**

(n) azü mesükba arem shiruru tekülak ka (fox)

\* Shirongi nabong ka nguset.

**Shirsa**

(Pron) Shirnok, shibasa ta metetnüba ( whoever)

\* Shirsa tzüsenogo, parnokji arogo nunger akümer.

**OLONG PAITEP # 6671**

1			2			3			4
			5		6		7		
8									
			9						
	10								
								11	12
			13				14		
15						16			

**TIPIEN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_\_\_ lu - (3)
- 10. Takdang temalen - (9)
- 11. Tesa \_\_\_ a - (3)
- 13. Ajungbena temulungjang tonglonsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

**LANGTSÜNGLEN**

- 1. Reprangdaksü - (4)
- 2. \_\_\_ ur - (3)
- 4. Kiojen yangludak - (6)
- 6. \_\_\_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. \_\_\_ adenshi - (4)
- 14. Tsünusenbongsü adokdak - (3)

**OLONG PAITEP # 6670 TELANGZÜBA**

**TIPIEN :**

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nungjem,
- 25. Sura.

**LANGTSÜNGLEN :**

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.

**NAI-A YA METETTER MA**



Bharat Jodo Nyay Yatra ya Indian National Congress lenir Rahul Gandhi tenzükba sentong ka lir aser iba sentong ya January 14, 2024 nü Manipur nung tenzük aser March 20, 2024 nü Mumbai nung tembangtsü. Iba mapang pai kilometre 6,713 (mile 4,171) shi tetsüng aser gari nung jajatsü. Iba mapang pai Manipur, Nagaland, Assam, Meghalaya, West Bengal, Bihar, Jharkhand, Odisha, Chhattisgarh, Uttar Pradesh, Madhya Pradesh, Rajasthan aser Gujarat state tem ajanga jajar Maharashtra nung tembangtsü.

**India nung Assam sorkar ya ajak dang ochimeshitiba: Rahul Gandhi**



Rahul Gandhi

**Guwahati, Aenjeti/January 18 (Agencies):** Congress lenir Rahul Gandhi-i Brehostibarnü (January 18) ashiba agi, linük ajunga nung Assam sorkar ya ajak dang ochimeshitiba.

Iba amala sentong ajanga Congress pur kecha majangzüksü ta BJP-i ashiba telangzüba agütsüba mapang Ghandi-i, taoba küm 'Bharat Jodo Yatra' ayongzüka agiba ajanga linük nung yimden yimsüsüba tsütsü temelenshi adokogo, ta ashi.

Sivasagar district kübok Halowating nung party worker

tem den o jembiba mapang Gandhi-i, nüburtem tsüngda tesempatep prokshiba aser nüburtem sen auyaba atema Bharatiya Janata Party (BJP) aser Rashtriya Swayamsevak Sangh (RSS) aija liasü.

"India nung sorkartem rongnung Assam ya ochimeshitiba asütsü. 'Bharat Jodo Nyay Yatra' mapang onoki Assam indang ken o ya benoka jembitsü," ta pai ashi.

Rahul Gandhi-isa, Manipur nung tang civil war mesüka tensa kanga mejungi kümer lir, ta ashi.

**Assam: MPLAD ochi mashi ken o nung ACS officer Sukanya puogo**

**Guwahati, Aenjeti/January 18 (Agencies):** Chief Minister indang Special Vigilance Cell-i mapa nungi anentsür aliba ACS officer Sukanya Borah, MPLAD ochi mashi ken o dak sendakba nung puogo.

Ken o dak sendakba nung special Vigilance Cell yagi taoba mapang Borah dang ken o ashishiogo, shiba Kamrup Metro district indang Additional District Commissioner (ADC) liasü.

Borah-i, lai aazükba dang nungi tali kinungertem tenüng amshia kiojentem bendenba atema aitsüogo.

Ano osang ajanga ashiba agi, lar adianu kati police dang

Sukanya-i tetsü ya tekelok meshidak ta shia, kiojen (asset) alizükogo, ta metetdaksü.

Borah-i, Guwahati, Morigaon, Hajo, aser North Guwahati densema tesem aika nung kiojentem alidena yua lir.

Members of Parliament Local Area Development (MPLAD) fund ajanga senotsü teyari agüja yngluba project tem nung inyakyim meshidakba ajanga temulung melema ACS ketdangsur ya 2023 küm March ita mapa nungi anentsü.

May ita Borah-i ken o dak sendakba nung anticipatory bail atema mepeshi, saka Gauhati High Court-i magizük.

Paisa, Manipur mesemdangba aser nüburtem tekangshi mangü ama toktsüba atema Ato Kilonser Narendra Modi aija liasü.

"Manipur nung civil war mesüka tensa kanga mejungi kümer lir, saka tanü tashi PM-i iba state ya mesemdang," ta Rahul Gandhi-i ashi.

Sentong nung o jembiba mapang Rahul Gandhi-isa, Bharat Jodo Nyay Yatra sentong ya Assam nung alirtemi pusemstsü imlaba lemsatapa liasü.

"Nagaland nung Bharat Jodo Nyay Yatra kanga junga agizükogo. Iba Yatra ya Assam nunga kasaji agizüksü imla atar," ta Rahul Gandhi-i ashi.

Temetettsükaji, Sivasagar district kübok Haloating nung wadang balala nungi nüburtem meyerijang aika adenshia iba Yatra agizüka liasü.

Congress party-i ashiba agi, Bharat Jodo Nyay Yatra ya, Narendra Modi-i aniba BJP sorkar ochi mashi inyakyim anema jajaba sentong ka lir.

"Iba Yatra nükjidongji ajak nem parnok tebilemba shidaksütsü atema sabang ka agütsütsü asoshi lir," ta Congress party-i ashi.

Bharat Jodo Nyay Yatra, yagi anogo ti tsüngda Assam kübok district 17 ayimjemtsü.

**Moreh-i central forces talila yoktsü: Manipur Angh**

**Imphal, Aenjeti/January 18 (Agencies):** Moreh nung security dak sendakba nung tensa tamajungba küma aoba mapang ka nung Manipur Angh Anusuiya Uikey-i, India aser Myanmar na arrtsü nung aliba jila yagi central security forces talila yoktsü ta shiogo.

Bodhbarnü nikongtsütsü Imphal nung tetsür shishilembartem rongnung lenirtem den senden ka amenba mapang Angh Anusuiya-i iba tenangzükba agüja liasü.

Imphal nung tetsür shishilembartemi, Moreh nung state sepaitem tepsetba anema Bodhbarnü Imphal yimti nung longkak aitba sentong ka ayongzüka agiba sülen Angh den ajurutepa liasü.

Tetsür lenirtem yagi Manipur



Manipur Angh Anusuiya Uikey

force kecha tenokdangba makai amakba indang metetdakba liasü.

Parnoki Manipur Angh dang Manipur chief minister N Biren Singh nem sepaitem ajak azüoktsü atema temelaba agütsütsü mepeshiba den Moreh-i state sepai talila yoktsü mepeshia liasü.

Raj Bhavan sangdong ka ajanga ashiba agi, Manipur Angh Anusuiya Uikey-i, tebilemstsütem kanga junga angadangogo aser security force yoka aliba indang metetdaksüba den central security force talila yoktsü tenangzükba agütsüogo.

Laisa, tetsür lenirtem dang state nung yimjung bener arutsü atema teka amteper inyaksangshitsü mepeshia liasü.

Angh dang Moreh nung tensa mejungi aliba indang metetdaksü, kong telungpurtemi state force nungi security personnel ana tepsetogo.

Maneni Moreh jila nung telungpurtemi state security



# Pakistan-i tayang kepzuka Iran nung missile khaloktsü

**Islamabad, Aenjeti/January 18 (Agencies):** Mongulbar nikonngang Iran-i Pakistan nung tesem kar amakba sülen Pakistan-ia Iran nung missile kar khaloktsüba ajanga nisung toku süogo.

Parnoki Iran south-east tsütsü Sistan-Baluchestan province nung kiralongrar jenoka aliba tesem amak ta Pakistan-i ashi.

Iran-i iba tesem amakba aitsü, kong tetsür asem, tebur ana aser tanur pezü tepset ta ashir.

Middle East nung tensa kanga mejungi aliba mapang Iran aser Pakistan tsüngta iba mepetmesü ya adoker.

Israel ya Palestine nunger Hamas telok den Gaza nung rarar aser Lebanon nunga Iran-i yariba Hezbollah telok den khateper, aser Iraq aser Syria nung Iran-i yariba telok temi US sepaitem dak tenük yoker amaker aser US o UK nati Yemen nung Iran-i yariba Houthis dak amaker, shiroki khu abenba rong amaker.

Pakistan indang foreign ministry ajanga ashiba agi, Iran nung Saravan yimti nung kiralongrarterem mapa tamajung

inyaktsü sentong yangluba itdangiter nungi osang aruba sülen amak aser onoki Iran indang sovereignty aser litsü lika temeden akumtsübor, ta ashi.

Pakistan army-ia sangdong ka nung, drones, rockets aser long-range missiles amshia Balochistan Liberation Army aser Balochistan Liberation Front alidak amak ta ashi.

Telok anaprong ya Balochistan nung tashi tuluba meshia küm aika raraba nung shilem agia arur, koba Pakistan south-west tsütsü region ka lir.

Iran den arütsü anasa Balochistan nung tesem ka Iran-i Mongulbarnü amakba Pakistan-i sashi-sashia aija liasü aser iba mapang tanur ana asü ta Islamabad-i ashi.

Iran-i Jaish al-Adl dak kising tenük yoker amak ta nenshia ashir. Jaish al-Adl ya ethnic Baloch Sunni Muslim group ka lir aser parnoki Pakistan nunger dak masü saka Iran telung nung lendong agüja aru.

Sistan-Baluchestan province nung tesem kar amakba mechi Tehran-i Pakistan indang chargé d'affaires jaok, ta Iranian state media nung Brehostibarnü ashi. Pakistan-i par ambassador

meyipa jaogo aser Pakistan envoy maotsü nokdanga lir.

China, Turkey aser Afghanistan nung aliba Taliban sorkari aremzüktepa jembishinütsü ajungshir.

Hopta tetenzüklena Iran yagu Iraq aser Syria nung tesem kar amak. Parnoki Islamic State aser Israel indang Mossad spy agency alidak amak ta ashir aser telok anaprong yagi ita tetenzüklen Iran nunger Kerman yimti nung bomb poklokja nisung 84 tepsetba nung shilem agia lir ta ashir.

Iran aser Pakistan tsüngta tesendaktep tepenja saka junga lir. Linük ana indang minister tem Davos nung tan hopta ang ajuruteper aser parnok tzüym sepaitemi Strait of Hormuz aser Persian Gulf nung joint exercise agia liasü.

Linük anaprongi arütsülen tzüzüing-özüing junga maliba atema bilemer, kong temesepba mozü shibelener aser Baloch telungpurtem yakyaka lir.

Pakistan-i Iran nung tesem ka amakba atema Tehran-i kanga shishiabo mebilemer amai ajiteter aser asürtem ya Iran nunger masü ta par ketdangtsüri ashi.

# Menungra Bilemteter



19/01/2022

**Temiem asür Imkong Ao**

Kodanga amadoktsü makokba temeim Oba, nai onok iba akümü nungi toktsür orr küm ana (2 years) junga arudang nü temeim mapa aser otem bilemteta Tsüngrem nem tenüngsang agütsür.

**Temiem Kinungtsü, Chirnur, Semchirtem aser Kinungertem.**



Office of the  
**Artang Ward Executive Committee**  
Mokokchung - 798601, Nagaland

## SANGDONGER

Dated 13/01/2024 Artang Yimden kiyong meita among nü machi majemtsü amshir nisung ter pezü (fourteen) aser expired goods dokan ka nung aliba agizüka Artang yimden pangzüng No. 12 dak ajemdaker tapet temerenshi agütsüba sangdonger.

Sd/-  
**T. Ati Mongro**  
Chairman

Sd/-  
**Obangtoshi Pongen**  
Secretary

# Israel-i southern Gaza nung kibong ka nungi nisung 16 tepset

**Jerusalem, Aenjeti/January 18 (Agencies):** Israel-i Gaza south tsütsü Rafah jila nung aliba ki ka nung tayimtsü amshia amakdang nisung 16 tepset aser parnok rongnung tesadang ka tanur lir, ta doctor temi Brehostibarnü ashi. Mitkar temi Gaza nung maneni tesem balala nung tenük yoker amaker, kong civilian tem dang jena aotsü shia lir.

Kasa mapang France aser Qatar tetsüngtai ia Hamas-i pua alir kanga sashia shiranger nem mozü agütsütsü Bodhibarnü bener yokba lema agütsü asü masüar tang tashi kecha sangdonga mali.

October 7 nü Hamas teloki Israel amakba ajanga rara tenzüker anogo 100 dak tema aor, aser Israel-i maneni mitkar tashi ajak amshia Gaza amaker aser par nukjidong ya 2007 nungi Gaza nung yimsü süa aruba Hamas telok ya samatsüner aser pua alirtem chiokdaksüner. Iba rara yagi region ajunga nung tensa mejungi kumdaktsür lir.

Palestine nunger nisung 24,000 dak tema tepsetogo aser tzükum anasa tesem tilaka nung nütsüing yongsük million 2.3 aliba nungi shilem 85 shi pei ki yutsür tesem balala nung jenoka lir, aser nütsüing yongsük shilem pezü kumer shilem ka achi-ajemtsü maka ayar, ta United Nations-i ashir.

Israel-i ashiba ama nisung meyerijang aika southern Gaza nung jenoka lir, kong United Nations-i lapokba tejenokdak tesemtem sünga Palestine nunger adenshia lir. Ajisüaka Israel-i maneni telungpur dak tenük yoker Gaza tesem ajungalen amakdang tetsür aser tanurtem timba tepseter.

Rafah nung aliba el-Najjar Hospital nung Dr. Talat Barhoum-ia Rafah nung nisung asüba jangjatsüogo aser nisung aika yiru ta ashi.

Gaza nung internet aser mobile services tem anogo pungo buba shibanga lir, ta internet access advocacy group NetBlocks ajanga ashi. Internet aser mobile services maliba ajanga timtem nung alirtem kumzüktsü maparen nung timtem ajurur aser osangtsüsang tejangja monguteter.

Iba rara ya Middle East ajungalen prokshia aor, kong Iran-i yariba telok temi US aser Israel nunger dak amaker. Lebanon nung Israel aser Hezbollah telungpur tsüngta rara aliba tuluba akumtsü akok, aser Yemen nung aliba Houthi telungpuri international rong dak maneni tenük yoker amaker.

Iran-i Iraq nung 'Israel nunger itdangiter' ta ajaba tesemtem aser Syria aser Pakistan nung telungpur aliba tesemtem nung tenük yoker missile amshia amaker.

Syria aser Pakistan nung amakba ya Gaza rara dak sendaka ali asü masüar mejangja. Saka iba ya ajanga Israel aser US den tensa mejungi aliba mapang Iran-i long-range missile amshia amaktsü tashi aliba sayur.

October 7 nü ama tanaben mataloktsü mechi Israel-i Hamas samatsütsü nangzüka lir. Iba anogo Hamas telungpur ya Israel arütsü alema aita nisung 1,200 shi tepset aser nisung 250 shi pua bener ao.

November ita ceasefire mapang Israel nungeri tepuokdak yua aliba Palestine nunger aika chiok aser iba

mapang Hamas-ia Israel nunger pua aliba nisung kar chioka liasü.

November ita nungi tenzüka rara adoka aliba telok ana tsüngta mozü agütsütsü tezüngzüktep asoshi jembia aru. Hamas-i ashiba agi, pua alir asoshi yokba mozü box shia Palestinian civilian asoshi mozü box 1,000 den chiyongtsü aser danga teyari oset yoktsü.

Item mozü ya Gaza-i yiogo, ta Qatar-i Bodhbar nikonngang ashi saka mozü ya pua alir nem agütsü asü masüar mejangja, shirnok ali telung bunkers densema tesem balala nung yua lir.

Hamas-i Gaza tesem ajungalen maneni meyerer rarar aser Israel dak rockets khaloktsür. Teti asoshi ceasefire ka mali tashi pua alirtem tejang kata mechioktsü ta Hamas-i ashir, koba Israel aser United States aser danga tembar linüktemi memulunger.

Iba rara tenzüker Palestine nunger nisung 24,448 tepsetogo aser 60,000 dak tema yiruogo, ta Gaza indang Health Ministry ajanga ashir. Rara mechi nisung aika ki o jen teraksa agi nembanga aliba magizükter ta ashir. Health Ministry yagi civilian mesüra Hamas züngsemtem asüba bendanga mashir saka asürtem shilem asem nung ana tetsür aser tanurtem lir ta ashir.

Civilian tali asüba atema Israel-i Hamas tenüing asener, kechiaser parnoki nisung longsoa aliba tesemtem nung rarar. Israel sepaitemi telungpur 9,000 shi tepsetogo ta ashir, saka kuli magütsür, aser külen Gaza nung rara tenzüker par sepai 193 asüba metetdaksüogo.

# Imran Khan-i Feb 8 election nung aoksatsütsü ashi



**Islamabad, Aenjeti/January 18 (Agencies):** Pakistan nung general elections agitsü ita ka majung lia kensü-osü agi sünger aliba taoba ato kilonser Imran Khan-i February 8 nü pa indang 'Plan C' amshitsü ta ashi. Pa indang 'Plan A' aser 'Plan B' nung tamakok ajuruba sülen tang ano pai iba osang ya sangdonger.

Arishi küm 71 tain Khan ya tepuokdak yua lir aser par PTI party nem cricket bat symbol magütsü. Rawalpindi nung aliba Adiala Jail nung osangbener den jembidang Khan-i Plan C indang onük ya süoka liasü.

Khan-i Plan C ya kechiar meshiaka PTI tekolakba Gohar Ali Khan-i tamalen ashiba agi, iba sentong ya party indang reserved seats tanaben agitsüba indang lir. Plan B ya PTI-i parnok dak nungi jakzüka aoba 'PTI-Nazriati' den 'batsman' symbol kübok election nung tokteptsü asoshi tezüngzüktep ka yangluba liasü, koba Election Commission of Pakistan (ECP) ajanga songtem.

Court nung kechi ataloker, aji linük nem angatetdaksütsü mechi Mongulbarnü Khan-i tepuokdak pa indang ken o jembiba live telecast asütsü khangha liasü.

Tasa tamajung yanglur temi parnok sendong raksatsütsü ta party lenirtemi meteta lir, anungji parnoki temelen tasa yanglu, ta Pakistan Tehreek-e-Insaf (PTI) tentetsangi ashi.

Khan-i ashiba agi, PTI sorkar anema tasa ka yanglu aser party workers 10,000 shi tepuokdak yua ano par party loksatsütsü maneni inyaker.

PTI tenteter ama pa aser pa kinungtsü Bushra Bibi anema ken o balala benoka lir, ta pai ashir.

Khan-isa cipher ken o indanga jembia aser taoba army chief Qamar Javed Bajwa-i cipher ken o temai madoktsü mechi pa nem 'two-third majority' agütsütsü ashi aser pa dang iba ken o yimjak nung sangdongra timtem ajurutsü ta amokmeren, ta shia liasü.

Gen Bajwa-i iba maongka ya President's House nung senden amenba mapang agütsü ta ashi. May 9 nü rongrongshirong adokba mechi par party dak tenük yok aser Corps Commander Hoise aser Pakistan Army indang GHQ dak tenük yoker longkak aitba ya 'London agreement' nung shilem ka liasü, ta paisa aitsü.

Iba mepetmesü nungya PTI maden, ta Khan-isa ashi.



## Rohit T20I nung century 5 yangluba mezüngbuba asayar kümogo



Rohit Sharma

**Aenjeti/January 18, 2024 (Agencies):** India captain Rohit Sharma, T20 international puti otsü nung century pongu yangluba mezüngbuba asayar kümogo. Pai Afghanistan den tasembuba T20 asayaba mapang century ka yanglua liasü.

Mezüngbuba asaya ana nung Sharma duck achiba sülen tasembuba asaya nungbo pai kanga junga asaya ball 64 nung century yanglua liasü, kong four 10 aser six 6 densema liasü.

Rohit-i iba format nung

tatensa 2018 küm West Indies den asayaba mapang century ka yanglur liasü. Pa Lucknow nung iba asaya nung out mesüi run 111 yanglu.

Bodhbarnü pai iba dang nungi run timtiba yanglua out mesüi run 121 yanglu. Bengaluru nung iba asaya nung pa nem Rinku Singh-ia (69) teyari tulu agütsü.

Run 121 yangluba sülen Rohit ya India nung batter tem rongnungi T20 nung run timtiba yangluba asayar pezübuba kümogo. Pa jakdang Shubman

Gill (126), Rururaj Gaikwad (123) aser Virat Kohli (122) lir.

Afghanistan den asayaba mapang tatembangbuba over pongu nung Rohit aser Rinku nati run 103 yanglu. Tatembangbuba over nungbo tenati run 36 yanglu kong six pongu aser four ka densema liasü.

Asaya nung mapang ka nungbo Afghanistan-i asaya azüoka liasü, kechiyong India team-i asayar pezü out sür run 22 dang yanglur liasü.

Yashasvi Jaiswal-i run 4, Virat Kohli golden duck, Shivam Dube-i run 1 aser Sanju Samson-a duck achi.

Afghanistan nung bowler tem rongnungi Fareed Ahmad Malik-i ball kanga junga ona pai run 20 agütsür wicket 3 agi.

Iba asayamung nung India team-i asaya asemprongla koka iba asayamung kokogo.

Iba asaya nung Axar Patel, Arshdeep Singh aser Jitesh Sharma melena Sanju Samson, Avesh Khan aser Kuldeep Yadav nung asayadakja liasü.

## Australian Open: Alcaraz aser Zverev na 3buba round-i iogo

**Aenjeti/January 18, 2024 (Agencies):** Bodhbarnü Australian Open tebur kija asaya nung second seed Carlos Alcaraz-i Italy nung unranked asayar Lorenzo Sonego den kanga toktepa asayar kokogo. Tena set pezü tashi asaya liasü.

Alcaraz aser Sonego na Rod Laver Arena nung ghonda 3 sür minute 20 asayaba sülen Spain nung World No.2 asayar yagi asaya 6-4, 6-7, 6-3, 7-6 agi koka liasü.

Grand Slam ana tashi koker aliba asayar ya taruba asaya China nung wildcard entry asayar Shang Juncheng den asayatsü, shiba Melbourne nung takok tajung angutsü atema kanga meranga asayadar.

Brehostibarnüsa kasa asayamung tebur kija asaya nung World number 6 asayar Alexander Zverev aser Slovenia nung qualifier Lukas Klein-i na kanga toktepa asayaba sülen Zverev-i kokogo.

Melbourne nung küm anabuba atonga tanabuba round

nung tsükba sülen Gremany nung asayar yagi 7-5, 3-6, 4-6, 7-6 (7/5), 7-6 (10/7) agi asaya koka liasü. Tena Margaret Court Arena nung ghonda pezü sür tesadang asaya liasü.

Ajisüaka iba asaya ya sixth seed asayar Zverev atema asendenshi mapang ka liasü, kechiyong pa rank 163buba nung aliba asayar, shiba tangang Grand Slam tanabuba asayar aser coach ka mali asayadar pai kanga nongshia asayaogo.

Pa tasembuba round nung America nung asayar Alex Michelsen den asayatsü.

Maneni tetsür kija asaya nung world No 5 America tsür Jessica Pegula France tsür Clara Burel-i 6-4, 6-2 agi tsükdaktsüogo.

Pegula-i arishi küm 22 tain asayar nem telangzüba kecha magütsüteti asaya kokdaktsü. Burel tasembuba asaya nung külem France tsür Oceane Dodin den asayatsü, shiba Italy tsür Martina Trevisan kokogo.

## Hamed Traore Napoli nung denogo



Hamed Traore

**Aenjeti/January 18, 2023 (Agencies):** Bournemouth midfielder Hamed Traore tang asaya aliba season madem tashi Italy club Napoli nungi asayatsü atema loan nung ogo.

Traore ya 2023 küm January ita loan nung Sassuolo nungi arua

Bournemouth nung aden, aser iba sülen pound million 20 shi agi küm pongu atema tenangzüktepba ka yanglua liasü.

Ivory Coast nungi arishi küm 23 tain international asaya ya ramen tashidak agi shirangba

ajanga hopta aika masayai aruogo aser pa tang asaya aliba Africa Cup of Nations nunga shilem magiteti lir.

Pa Bournemouth nungi tang tashi nung 13 ben asayar lir, kong tang asaya aliba season nung trokben asayaba densema lir.

Ajisüaka pa September ita nung Premier League nung khien danga asaya mali.

"AFC Bournemouth den sendaka alirtem ajaki Hamed tang asaya aliba season nung tanungba asayatem nung junga asayatsü imlaja atar," ta club sangdong ka ajanga metetdaktsü.

## SA20: Marcus Stoinis Durban Super Giants nung denogo



Marcus Stoinis

**Aenjeti/January 18, 2024 (Agencies):** Australia nung World Cup koker aliba asaya Marcus Stoinis, SA20 nung tanungba asayatem atema Durban's Super Giants (DSG) nung denogo.

Stoinis-i West Indies nung asayar Nicholas Pooran melenogo aser iba ajanga tang kanga junga asaya aliba DSG team tashi taitba kümdaktsütsü. Parnok tang point table nung tanabuba jenjang nung lir aser asaya asem nung asemprongla koker lir.

Arishi küm 34 tain Stoinis shiba Perth nungi lir, pai tajangshiba aika bena lir aser pa Australia team nungi format ajak nung asaya 127 nung asayaogo aser iba den T20 asaya 250 tashi nung asayaogo.

Stoinis-i T20 asaya nung asaya 57 aser innings 47 nung

run 915 yanglua lir aser pa indang average 30.50 aser striking rate 145 lir. Pai half century ana tashi yangluogo aser tang tashi nung pai run timtiba yanglubaji 78 lir.

Alima ajunga nung club balala nungi asayaba mapang pai run 5,198 yanglur lir. Pa indang average 30.39 aser strike rate 137 dak tema lir. Pai club balala nungi asayaba mapang half century 27 yanglur lir aser run ajak dang timtiba yanglubaji 147 lir.

Stoinis ya Indian Premier League team Lucknow Super Giants nunga densema lir, koba Durban's Super Giants den sendaktepa lir.

Pretoria Capitals den Brehostibarnü masaya tsüngda Afghanistan nung asayar Naveen-ul-Haq-a DSG nung denogo. Ul-Haq-i Richard Gleeson melenogo.

## ISL: Adrian Luna melena Cernych shimogo

**Kochi, Aenjeti/January 18 (Agencies):** Kerala Blasters nung yirur alisang Adrian Luna shiba melentsü ta bilema arur tang Lithuania nung forward Fedor Cernych-i melenogo.

"Season tatem tashi tenangzüktepba yangluogo. Luna temang tajungba küma taruba season nungibo asayatsü imla atar," ta source kati ashi.

"Asayar anaprongla aser club-i mulungtepaka transfer ya medical dak sendaka lir koba mapang tatsüka tsüngda tembangtsü," ta source-isa shisem.

Cernych ya Super Cup sülenang team nung adentsü aser pa Indian Super League nung taruba asaya nungi asayatettsü.

Cernych ya Russia nung Lithuania nung kibong ka nung



Fedor Cernych

aso aser pa Vilnius, Lithuania tetsü o tebou nati anitet. Pa LFF II League club Granitas Vilnius nung 2007 küm mezüng asaya-a football career tenzük iba sülen pa 2009 küm Dnepr Mogilev-i ao.

Pa 2012 küm Naftan Novopolotsk-i loan nung yok aser küm ana sülen Polish club Gornik Lezna-i ao. 2018 küm

pa Russia club Dynamo Moscow nung oa aden aser 2019 küm FC Orenburg-i loan nung yok. 2020 küm maneni pa Jagiellonia Bialystok-i meyipa ao.

Pa 2012 küm mezüngbuba linük team nungi asaya aser pai goal 12 tashi idakja liasü.

Cernych ya club jenjang nung asayaba mapang timba left winger ama asayar, ajisüaka pai centre forward ama-a asayateter. Kasa mapang nung Luna timba centre midfield position nung asayar aser aiben striker ama asayar.

Luna yiruba sülen Vibin Mohanan pa melena asaya aruogo. Osang ajanga ashiba agi, Blasters management-i forward line akangshitsü atema attack süa asayaba asayar ka aginüa liasü.

## BILEMDANGANG

"Junga litetbaji dang mangyang tajungtiba."